

CONVENIO DE COLABORACIÓN ENTRE A AXENCIA GALEGA DE INFRAESTRUTURAS E A FEDERACIÓN GALEGA DE CICLISMO PARA O DESENVOLVEMENTO DE ACTUACIÓNS DE FOMENTO DA SEGURIDADE VIARIA PARA CICLISTAS

Santiago de Compostela, 18 de maio de 2016

REUNIDOS

Dunha parte, Ethel M^a Vázquez Mourelle, presidenta da Axencia Galega de Infraestruturas, en virtude das facultades que lle atribúe o artigo 9.2.a) do Decreto 173/2011, do 4 de agosto, polo que se aproba o estatuto da Axencia Galega de Infraestruturas.


Doutra parte, Juan Carlos Muñiz Nieto, presidente da Federación Galega de Ciclismo, facultado para a formalización deste convenio en virtude das competencias que lle atribúe o artigo 17 dos seus estatutos.

Ambas as dúas partes recoñécense mutuamente na calidade en que interveñen con capacidade legal, suficiente e necesaria para o outorgamento do presente convenio de colaboración e, a tal efecto

EXPOÑEN



Primeiro. A Axencia Galega de Infraestruturas ten entre os seus obxectivos o impulso, a coordinación e a xestión da política autonómica en materia de estradas. Para tales efectos, e de acordo co artigo 7.1.p) do Decreto 173/2011, do 4 de agosto, polo que se aproba o estatuto da Axencia Galega de Infraestruturas, entre as súas funcións e competencias está o impulso, promoción e coordinación das estratexias de seguridade viaria.



Segundo. O Plan de Seguridade Viaria de Galicia 2016-2010 ten como obxectivo estratéxico 2 a consecución de vías de tránsito e mobilidade máis seguras, contemplando entre as súas accións a mellora da seguridade viaria dos usuarios máis vulnerables, entre eles os ciclistas. E como obxectivo estratéxico 4 conseguir

uns usuarios máis seguros no seu tránsito polas estradas, o que abrangue a súa sensibilización e educación en seguridade viaria.

Terceiro. A Federación Galega de Ciclismo ten coma fins a dirección, defensa e promoción do ciclismo en tódalas súas formas no ámbito da Comunidade Autónoma de Galicia, e entre as súas funcións establécese a de colaborar coas administracións públicas e coa Real Federación Española de Ciclismo, así como coas restantes entidades deportivas, na promoción do ciclismo.

Cuarto. A Federación Galega de Ciclismo conta cunha grande capacidade de interlocución e difusión no colectivo ciclista galego, e máis directamente cos 262 clubs ciclistas de Galicia e cos 7.000 ciclistas federados a día de hoxe .

Quinto. En consecuencia, considerando a confluencia dos intereses das partes comparecentes, faise preciso artellar as bases para a óptima coordinación e así regular a colaboración nas súas actuacións entre a Axencia Galega de Infraestruturas e a Federación Galega de Ciclismo. Para o fin mencionado, formalízase o presente convenio con suxeición ás seguintes



CLÁUSULAS

PRIMEIRA. OBXECTO



O obxecto deste convenio é establecer as bases para a colaboración entre a Axencia Galega de Infraestruturas e a Federación Galega de Ciclismo para o desenvolvemento de actuacións de fomento da seguridade viaria para ciclistas, con especial incidencia na mellora da súa visibilidade no seu tránsito polas estradas.

SEGUNDA. COMPROMISOS DA FEDERACIÓN GALEGA DE CICLISMO

A Federación Galega de la Ciclismo comprométese ao reparto dos chalecos con elementos reflectores entre os/as ciclistas. Os chalecos terán as características descritas no anexo deste convenio, e levarán impreso o logo da Xunta de Galicia, de acordo establecido no manual de identidade corporativa.

A Federación publicitará esta iniciativa na súa páxina web, de modo que se acade a máxima difusión posible.


TERCEIRA.- COMPROMISOS DA XUNTA DE GALICIA

A Xunta de Galicia, a través da Axencia Galega de Infraestruturas, asume o compromiso de adquirir os chalecos reflectores que serán distribuídos pola Federación Galega de Ciclismo, destinando para iso ata un máximo de **DOCE MIL EUROS (12.000,00 €)**, IVE incluído, con cargo aos orzamentos do ano 2016, aplicación 07.A1.512B.640.1, código de proxecto 2013-00003.

CUARTA.- COMISIÓN DE SEGUIMIENTO

Constituirase unha comisión de seguimento formada por un representante da Axencia Galega de Infraestruturas e un representante da Federación Galega de Ciclismo. As súas funcións, entre outras, serán as seguintes:

- 
- Impulsar e avaliar o cumprimento do presente convenio, propoñendo as actuacións que se consideren precisas para o seu desenvolvemento.
 - Propoñer a interpretación, en caso de dúbida, do contido do presente convenio.
 - Propoñer ás partes a resolución das posibles controversias que puideran xurdir na aplicación do convenio.



Esta comisión reunirse as veces que se estimen oportunas para o cumprimento do presente convenio. En todo caso a solución das incidencias estará condicionada polas limitacións orzamentarias indicadas na cláusula terceira.

QUINTA. NATUREZA DO CONVENIO

Este convenio ten natureza administrativa e regularase polo establecido no presente convenio e, supletoriamente, polos principios do Real decreto lexislativo 3/2011, do 14 de novembro, polo que se aproba o texto refundido da Lei de contratos do sector público, consonte o establecido no artigo 4.2 da antedita lei.

SEXTA.-MODIFICACIÓNS DO CONVENIO

As modificacións formalizaranse mediante “addenda”, cos mesmos requisitos e condicións que para a aprobación do convenio.

SETIMA. INTERPRETACIÓN E INCUMPRIMENTOS

1.- As dúbidas que se presenten na súa interpretación, en caso de discrepancia, serán resoltas, visto o informe da Comisión de Seguimento, pola presidenta da Axencia Galega de Infraestruturas, poñendo así fin á vía administrativa.

2.- Serán causas de extinción deste convenio:

- non cumprimento do seu obxecto.
- A inviabilidade da realización das actuacións descritas neste convenio, por causas non imputables ás partes.
- O incumprimento de carácter total ou parcial de calquera das cláusulas do presente convenio. Entenderase por incumprimento parcial aquel que implica en maior ou menor grao a non consecución dos fins propios do convenio ou impidan de xeito directo ou indirecto as actuacións previstas no presente convenio.
- Denuncia por causas de interese público, a instancia de calquera das partes.

Cada unha das situacións descritas por si soa é causa suficiente de rescisión do convenio.

OITAVA. PUBLICIDADE

A sinatura do convenio leva implícito o consentimento expreso de todas as partes para a publicación dos datos e especificacións contidas naquel, de conformidade co establecido no artigo 15 da Lei 1/2016, do 18 de xaneiro, de transparencia e bo goberno.

NOVENA. VIXENCIA DO CONVENIO

Este convenio terá efecto dende a súa sinatura ata o 31.12.2016.


En proba de conformidade asinan por triplicado no lugar e data indicados no encabezamento

A presidenta
da Axencia Galega de Infraestruturas



Ethel Mª Vázquez Mourelle

O presidente
da Federación Galega de Ciclismo




Juan Carlos Muñoz Nieto

ANEXO: CARACTERÍSTICAS DOS CHALECOS A SUBMINISTRAR

As especificacións técnicas e as características dos chalecos a subministrar serán como mínimo as que se relacionan a continuación:

- **Denominación:** Chaleco reflectante de alta visibilidade certificado como Equipo de Protección Individual (EPI) clase 2
- **Normativa:** Normas europeas EN-340 e EN-471
- **Composición:** tecido técnico transpirable de licra e poliéster.
 - Dúas bandas reflectantes paralelas en vertical no contorno do chaleco cosidas ou termoselladas, cun ancho mínimo de cada banda de 5 cm que garanten unha visibilidade de 360º en condicións de pouca luz e incluso nas horas centrais do día.
 - Remates elásticos na cintura
 - Tecido altamente resistente, transpirable para a práctica deportiva
 - Peche dianteiro con cremalleira
 - Serigrafiado no peito esquerdo do anagrama "Xunta de Galicia"
 - Serigrafiado no peito dereito en tamaño pequeno #EuFagomeVer e o logo da Federación Galega de Ciclismo integrado dentro da franxa reflectante.



XUNTA DE GALICIA



Nota: o arquivo do anagrama atópase en "<http://www.xunta.es/variante-da-marca>"

- **Cor do chaleco:** amarelo fluorescente
- **Talle:** as tallas que se consideren necesarias